



17.03.2016. četvrtak, danas smo imali do sada najveći broj posjetitelja na farmi Nešto Više. Naši drugari iz Osnovne škole Drežnica, Osnovne škole Buna i iz Udruženja roditelja i prijatelja osoba sa posebnim potrebama Sunce, su zajedno sa našim dragim prijateljima iz UNICEF-a Amelom i Annom, najvrijednijim praktikantima nadaleko i naširoko, te osobljem NV obogatili farmu sa mnogo cvijetnih kultura, citrusima (limunom i mandarinama), jagodama, povrćem (krompirom i kupusnjačama), aronijom, ribizlama, šipcima i kupinama, te lovor-višnjom. Na šest pripremljenih "centara" na farmi, vrijedni drugari su u šest grupa radili na sadnji svake od gore navedene kulture: naši praktikanti (mladi agronomi) su uz praktičan rad na sadnji, pojasnili vrijednim osnovcima kako se i zašto baš tako sadi svaka kultura na kojoj se radilo. Svi su timovi sjajno obavili svoje zadatke - a sadnice limuna, mandarina i šipaka su obilježeni nazivima grupa koje su ih posadile, kako bismo u budućnosti imali uspomenu na naše drage volontere, dok budemo jeli sočne voćkice. I da, ako nas požele posjetiti nakon nekoliko godina, da znaju koja su stabla oni posadili sa svojom grupom: Kreativstube, Leptirići, Držićani, Seljaci, Ženska snaga i Jagodice □ Posebno moramo pohvaliti naše drugare iz Sunca: Slađu, Zlatu, Eminu, Rejhanu, Jakija, Majdu, Sašu, Sadetu, Sabinu i Šemsu - kako su oni već uhodani volonteri na NV farmi, danas su sa našim sjajnim praktikantima bili domaćini i njihova "desna ruka" - pravi asistenti na važnim zadacima sadnje cvijeća, voća i povrća. Nakon obavljenog posla, svi zajedno smo ručali, malo se zaslادili i popili koji sokić, a onda su naši drugari iz Drežnice i Bune morali da se vrate na nastavu: obećali su da će opet doći da se družimo, radimo i učimo. To su pravi mladi poduzetnici! Zahvaljujemo i njihovim krasnim nastavnicama Ivani i Saneli, koje su nam također uljepšale dan.

Ponosni smo na sve naše učesnike današnje akcije, a tek ćemo u narednim danima moći sagledati koliko se finog posla uradilo danas. Lijepo je kad je farma šarena, glasna, kad se po njoj juri tamo-ovamo, kad se radi, zabavlja, druži i smije na glas. Volimo kad je farma takva! Današnja akcija je bila više nego uspješna, bila je bolja i ljepša nego što smo se i nadali, a najveću zaslugu za to imaju: Muhamed, Vladislav, Mirnesa, Ibrahim, Selmir, Selma, Alida i Vanesa - mladi stručnjaci na praksi u NV. Danas ste još jednom prevazišli sami sebe, ponosni smo na svakoga od vas pojedinačno, a posebno smo ponosni na vas kao na jedan sjajan tim! Blago se vašim budućim poslodavcima, i ne znaju koliko će sreće imati kad zaposle baš vas!

Današnje aktivnosti su organizirane u okviru projekta “Životne vještine za budućnost-učimo, radimo!” koji je dio je opsežnog projekta “Podrška trajnim rješenjima Revidirane strategije za provedbu Aneksa VII Dejtonskog mirovnog sporazuma” vrijedan 8,1 miliona eura finansira Evropska unija (u iznosu od 7 miliona eura kroz program IPA 2012), a sufinansira (u iznosu 1,1, miliona eura) i implementira UNHCR u suradnji sa projektnim partnerima u deset prioriternih općina. Cilj projekta je pomoći najmanje 2.400 ugroženih raseljenih osoba i povratnika u BiH, uključujući žene žrtve rata, u pronalaženju rješenja za društvene izazove sa kojima se svakodnevno susreću, kroz usku saradnju lokalnih vlasti, lokalne zajednice, civilnog društva i projektnih partnera, zajedno sa Ministarstvom za ljudska prava i izbjeglice Bosne i Hercegovine.

Posebno se želimo zahvaliti Unicef-u u Bosni i Hercegovini za sve što čine da zajedno dopremo do što više mladih, i da ih naučimo Nešto Više!

[više fotografija pogledajte ovdje](#)